

0.0.1 khayasuttam

1. yo bhikkhave, maggo yā paṭipadā taṇhakkhayāya saṁvattati¹, taṁ maggaṁ taṁ paṭipadaṁ bhāvētha. katamo ca bhikkhave, maggo katamā ca paṭipadā taṇhakkhayāya saṁvattati: yadidaṁ sattabojjhaṅgā. katame satta: satisambojjhaṅgo dhammavicayasambojjhaṅgo viriyasambojjhaṅgo pītisambojjhaṅgo passaddhisambojjhaṅgo samādhisambojjhaṅgo upekkhāsambojjhaṅgoti. evaṁ vutte āyasmā udāyi bhagavantaṁ etadavoca: kathaṁ bhāvitā nu kho bhante, satta bojjhaṅgā kathaṁ bahulīkatā taṇhakkhayāya saṁvattanti.

2. idhūdāyi, bhikkhu satisambojjhaṅgaṁ bhāveti vivekanissitaṁ virāganissitaṁ nirodhanissitaṁ vossaggapariṇāmiṁ vipulaṁ² mahaggataṁ appamāṇaṁ abyāpajjhaṁ. tassa satisambojjhaṅgaṁ bhāvayato vivekanissitaṁ virāganissitaṁ nirodhanissitaṁ vossaggapariṇāmiṁ. vipulaṁ mahaggataṁ appamāṇaṁ abyāpajjhaṁ. taṇhā pahīyati. taṇhāya pahānā kammaṁ pahīyati. kammaṁ pahānā dukkhaṁ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

3. dhammavicayasambojjhaṅgaṁ bhāveti vivekanissitaṁ virāganissitaṁ nirodhanissitaṁ vossaggapariṇāmiṁ vipulaṁ mahaggataṁ appamāṇaṁ abyāpajjhaṁ.

¹saṁvattanti - sī, 1, 2.

²vepullaṁ - sī 1, 2.

tassa dhammavicayasambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

4. viriyasambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa viriyasambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

5. pītisambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa pītisambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

6. passaddhisambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vi-

pulaṃ mahaggataṃ appamāṇaṃ abyāpajjhaṃ. tassa passaddhisambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ. vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

7. samādhisambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa samādhisambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ. vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

8. upekkhāsambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa upekkhāsambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ. vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.